

# INUIT ATAQATIGIIT

## Inatsisartuni



UKA 2020/imm. 131  
Ulloq 18. november 2020  
Stine Egede

**Innarluutilinnik sullissisutut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittussamik ataavartussamik Naalackersuisut periusissiorlutillu iliusissatut pilersarusiornissaannut piumasaqarfigineqarnissaat pillugu Inatsisartut aalajangiiffigisassaattut siunnersuut. Periusissiami iliusissatullu pilersaarummi suliniutaasut anguniagassatut allassimasunut naapertuunnersut piffissap ingerlanerani nalilersuisarnissaq ilaassaaq. Periusissiatut iliusissatullu pilersaarut saqqummiunneqassaaq kingusinnerpaamik UKA2021-mi. (Inatsisartunut ilaasortaq Sofia Geisler, Inuit Ataqatigiit)**

Siullermik Inatsisartuni ilaasortaq Sofia Geisler, Inuit Ataqatigiit, siunnersuutaanut pitsaasumut qujaffigiumavarput.

Qanoq angajoqqaajulluni toqqissisimanartigissagalarpa nunatsinni innarluutilittatta amerlanerpaat naammattunik ilinniarsimasunit sullinneqaraluarpa.

Naak suliffiit ilaanni sulisut ilinniarsimasut arlaqarsinnaasaraluit, suli ullumikkut sullissisut amerlasoorujussuit ilinniarsimasuunngillat. Ilaalli allaat pikkorissarsimasuusarik.

Innarluutit ersittut ersinngitsullu amerlasoorpassuummata, tamannalu pissutigalugu innarluutillit qisuariaatigisartagaat assigiinngeqimmata ilinniagaqarsimasuunissaq pingaartorujussuuvoq. Innarluuteqartoq paasineqanngikkaangami assigiinngitsorpasuarunik qisuariarsinnaasarpoq.

Ilaat matusinnaapput, ilaat kamallutik imminnut ikilersorsinnaapput, ilaat sullissisuminnut ilaqtaminnulluunniit sakkortuumik pissusilersorsinnaapput allaammi ilaat malunnaangilluinnarsinnaapput naak qamuunamikkut paatsiveerunnersuup silarsuaniikkaluarlutik.

Taamaattumik innarluutip suunera aallaavigalugu aamma maani nunatsinni angerlarsimaffinnik pilersitsinikuuvugut, innarluutilinnut sullissineq pitsaanerpaaffissaatinniarlugu.

Taamaakkaluortoq nuna tamakkerlugu sullissiisussanik ilinniarsimasunik amigaateqartorujussuuvoq.

Amerlasoorpassuit ilinniarsimanatik sulisuupput. Ilaqarput ukiorpassuit sulisimanertik aallaavigalugu immaqalu ilaasa pikkorissartinneqarsimanerminnik aallaaveqarlutik sullitaminnut paasinnillutik pitsaasumik sullissisut.

Ajoraluartumilli aamma piviusuuvoq sulisut ilaasa akulikippallaamik taarsaannerisa kingunerisaanik sullitanut sunniinerluttarnerat. Imaluunniit paatsooqatigiinnerit kingunerlussinnaasartut pilersinneqartarnerat.

Takorloorummi oqaaseqartuunngikkaani, usersornermillu ilinniarsimannngikkaanni qanoq ajornakusoortigissanersoq sullitaq qanoq paasissanerlugu imaluunniit nassuiaatissanerlugu.

Imaluunniit sullitaq ukiumigut 18-nik ukioqaraluarluni, eqqarsartaatsimigut suli meerannguatut eqqarsartaasilik inersimasutut pissusilersorfigalugu sullinniassagukku paatsooqatigiinnerit qanoq annertutigisinnaanersut.

Ukiuni kingullerni qujanartumik eqqummaariffiartorpagut aamma assigiinngitsutigut alloriarnikuuvugut. Soorlu Tilioq pilersinneqarpoq, taannalu aallaavigalugu eqqumaffissat isiginiarneqarnerulerput kisialli Tilioq qanorluunniit sulilluartigigaluarpat innarluutilinnik sullisisussat naammaginartumik ilinniagallit imaluunniit pikkorissarsimasut naammattut pigilertinnagit suliaq kigaatsuararsuarmik ingerlassaaq.

Kommuneni Isumaginnittoqarfinni sullissinerup silarsuani sulisut malinnaaniapiloortuaannartillugit assigiinngitsutigut sullissinermi pitsaanerpaaffissaliisinnaaneq inornartorujussuusarpoq. Sullissisut annertuallaanik akisussaaffinnik imaluunniit sulianik amerlavallaartumik suliassaqartinneqartarmata.

Tiliup nalunaarusiarisartagai aallaavigalugit kommunet “annaassiniartutullusooq” sulisariaqartarnissaat takujuartussaalerunarpaput. Tamannalu ajuusaarnarpoq.

Nunatsinni Inuit Innarluutillit Kattuffiata oqariartuutaat ilaatigut imaappoq; kommunet artorsarpallaarput sullissinerminnut, sullitanut pitsaanerussagaluarpoq qitiusuminngaanniit suliarineqaleruni.

Taassumaannaalluunniit oqariartornerup takutippaa killiffitta qanoq ilungersunartiginera.

Ajoraluartumik takornartaajunnaarnikuuvoq kommuneni sulisut ilinniarluarsimasut amerlasuut qitiusumut nutserartarmata tassani akissaatit pitsaanerummata.

Alla eqqaasariaqartoq tassaavoq tusilartunut sullissineq. Siornatigut marlunnik siunnersorteqarsimanagerat maannalu siunnersorteqarunnaarsimanagerat eqqarsaatigalugu kinguariarnerujussuuvoq. Siornatigut tusilartut ilaqaatallu pikkorissartinneqartarput ukiumut naapeqatigiissinneqarlutik.

Takorloorummi anaanat, imaluunniit ataatat tusilartuuppat oqaluussinnaanngikkitt.

Isumalluutaavoq pissassarfik, kisialli paasinarsereerpoq aamma Pissassarfik sulisutigut unammillernartumiittoq aamma.

Taamaattumik sumulluunniit saakkaluarutta innarluutilinnik sullissinissamik eqqartuinitisinni assorsuaq suli nunatsinni inerisagassaqarpugut.

Naalackersuisut siunnersuummut itigartitsinerat ajuusaarutigigatsigu oqaatigissavarput. Siunnersuut siornatigut Inatsisartuni akuersissutigineqareernikuuvoq. Ajoraluartumilli qinersisoqarnerani kiviinnarsimarpasilluni.

Inuit Ataqtigiinni isumaqarpugut una siunnersuutigineqartoq Naalackersuisut sulianut ingerlataanut ilannguttussanngorlugu ingerlatinneqassasoq. Ataatsimiititaliami suleqatigiillaqqinnerput innersuussutigalugu, isumassanik iluatinnartunik maani oqallinnermi qaqilerneqartunik Naalackersuisunut apuussinissaq siunertaralugu, taamaalilluni Naalackersuisut suliarninnik 2022-mi saqqummiinissaanni Partiit tamarmiusut akimorlutik peqataaffigerigassaanik Nunatsinni Innarluutillit amerlanerpaat iluaqtissinneqarnissaannik suliaqarniassagatta.

